

1 Tetadönitenteidi inänite **Pabodo cadota ante tänota** nänö yewæmongainta

Pabodo, Waa quëwëedäni, ante apæñecäimpa

¹ Botö Pabodobo inömo imopa. Mönö tönïñada Tidibänö tönö Tımoteo tönö godongämæ apænete ate yewæmömo aedäni. Mönö Mæmpo Wængongui nempo ayæ mönö Awënë Itota Codito nempo quëwëningue minitö Tetadönica iñömö quëwëningue Codito ingante godongämæ mini pönencabo ëñëedäni. Mönö Wængongui waadete pönö cæcä ate minitö gänë entawencæminimpa, ante yewæmömönipa.

Tetadönitenteidi näni wede pönëñö

² Mönitö möni apæneyedë minitö tömämïni beyæ ante Wængongui ingante cöwë waa ate pönëningue apænemönipa. ³ Minitö Itota ingante æbänö wede pönente cæmïni imïnipa, ante ayæ tömengä ingante waadete pönëningue æbänö cæmïni imïnipa, ante cöwë apænemönipa. Ayæ minitö wæwëmïni incæ, Mönö Awënë Itota Codito pongä ate watapæ bacæimpa, ante pönëningue æbänö wæntæye inämaï ee cæmïni imïnipa, ante adingue mönitö Wængongui mönö Mæmpo weca æyedëmë ponte apænedingue cöwë mäninö ante pönëningue apænemönipa. ⁴ Mönitö tönïñamïni, minitö Wængongui nänö në waademïni inömïni inte ëñëedäni. Tömengä minitö imïnite apænte ængacäimpa, ante do ëñëmönipa. ⁵ Edæ Itota

ingantedö ante mönitö watapæ möni apænedö ante wii önonquedö ante apænetamönipa. Wæætë Wængongui nämä tæi piñænte në angä beyænque mönitö mïnitö iminite apænedinque Awënë inte bai apænetamönipa. Wængongui Önöwoca mönitö tönö godongämæ cæcä beyænque mönitö mäninö möni watapæ apænedö ante, Nö impa, ante ædæmö pönëninque apænetamönipa. Mänömai apænemöni ëñëmïni adinque mönitö, Wængongui mïnitö iminite apænte ængacäimpa, ante do ëñëmönipa. Ayæ mïnitö weca quëwëninque mönitö æbänö mïnitö beyæ ante quëwentamönii, ante do ëñëmïnipa.

⁶ Wængongui Önöwoca watapæ nänö topämo ante pönongä ænimïni inte mïnitö nanguï caate wæmïni incæte Wængongui nänö angainö ante ëñëninque Ao ante æmïnitapa. Mönitö æbänö cæmönii, ante adinque Awënë Itota Codito æbänö cæcää, ante adinque mïnitö adobai möni cæbai cæmïni bamïnitapa. ⁷ Ìinque Mäatedöniabæ quëwënäni tönö Acayabæ quëwënäni iñömö Itota Codito ingante në pönënäni inönäni inte tömënäni tömänäni mïni cædi adinque mïni cæbai adobai cædänitapa. ⁸ Mïnitö wede pönëninque apænemïni beyænque Wængongui nänö angainö ante Mäatedöniabæ quëwënäni tönö Acayabæ quëwënäni ëñënäni incæte wii mänii mëñömongaque iñömö quëwënäni ëñënanipa. Wæætë ædömë quëwënäni iñönänite wadäni mïnitö Wængongui ingante mïni wede pönëmämo ante tededäni do ëñënanipa.

Ìinque mönitö mänii beyæ quïnante godömenque

apænequii. ⁹ Edæ, Mönitö mīnitö weca eñacæ pōninque apænemōni eñēninque mīnitö æbānō watapæ eñēmīnitapa, ante mānīnāni nē pōnēnāni incæ apænedāni eñēmōnipa. Ayæ adodāni mīnitö imīnitedō ante iīmaī ante apænedānipa. Mīnitö, Mönitö wængonguīdi impa, ante mīni cōnōnincacoo incæ emō cæte wadæ pōninque mōnō Wængonguī gāmænō pōmīnitapa, ante apænedāni eñēmōnipa. Ayæ, Nāwā Wængonguī nē Quēwēnongā ingante eñēnte cæcæmōnimpa, ante pōmīnitapa, ante apænedāni eñēmōnipa. ¹⁰ Ayæ tōmengā Wengā oōnædē nē quēwēnongā inte ocæ emænte poncæcāimpa, ante mīnitö wānō cōmīni imīnipa, ante apænedāni eñēmōnipa. Tōmengā do wængaingā iñongante Wængonguī, Nāni omæmoe, angā nē nāni omæmongaingā ingampa. Iñinque Wængonguī mōnō imonte nānō piinte panguimāmo ante wæyōmonte tōmengā Wengā iñōmō ængā beyænque quēwenguīmō imompa.

2

Pabodo Tetadōnica iñōmō nānō cædō

¹ Mönitö tōniñamīni eñēedāni. Mönitö mīnitö weca mōni eñacæ pōñedē mōni cædinō wīi ononque impa, ante mīnitö do eñēmīnimpa. ² Mönitö do mīni eñēnīnō baī mōnitö wēēnēñedē Pidipoto iñōmō quēwēñōmōnite māniñōmō quēwēnāni mōnitö imōnite wēnæ wēnæ cædāni beyænque wæwente intamōnipa. Adodāni mōnitö imōnite, Mīnitö wēnæ wēnæ cæmīni imīnipa, ante tedewēnāni eñēninque wætāmōnipa, ante mīnitö adobaī eñēmīnipa. Ayæ mīnitö weca ponte quēwēñōmōnite waodāni tæiyænāni mōnitö imōnite Baa ante,

Minitö apænedämaï incæminimpa, ante wææ änäni incæte Wængonguï mönitö tönö godongämæ cæcä beyænque tömengä ingantedö ante watapæ möni apænedö ante minitö iminite guiñenāmaï apænetamönipa.

³ Edæ mönitö, Wængonguï ingante pönëmini inique waa imaimpa, ante minitö iminite nanguï apænemöni inte wii babæ wapiticæ pönëninque apænemönipa. Wii wentamö entawëninque pönente apænemönipa cæminii. Ayæ adobaï, Minitö oda cæcæminimpa, ante cædämaï inte mönitö wii wapiticæ apænemönipa. ⁴ Wæætë Wængonguï mönitö imönite apænedinque, Waa cæmini abopa, äninque, Minitö Itota ingantedö ante botö watapæ apænedö ante në apænemini ëñencædänimpa, ante angä ëñëninque mönitö në apænemöni imönipa. Mönitö, Waodäni mönitö imönite waa acædänimpa, ante cædämaï inte wæætë, Wængonguinque mönitö imönite waa acæcäimpa, ante cædinque apænemönipa. Edæ tömengä, Æbänö entawëminii, ante mönö entawëñömö ante në acä ingampa. ⁵ Wadäni nämä beyænque ante, Waa tedemöni ëñëninque mönitö imönite wæætë pönö cæcædänimpa, ante babæ cædäni bai mönitö inñömö dicæ mänömainö ante minitö iminite babæ cætamöniyaa. Mänömainö ante do ëñëmönipa. Ayæ, Mönitö wii minitö godonte æinta ante beyæ apænetamönipa, ante do ëñëmönipa. Æbänö cætamönipa, ante Wængonguï në acä ingampa. ⁶ Waodäni mönitö imönite waa acædänimpa, ante mönitö dicæ ämönitawogaa.

Ayæ, Minitö incæ wadäni incæ mönitö imönite waa acædänimpa, ante dicæ ämönitawogaa. ⁷ Edæ,

Itota Codito nänö da godongaimöni inömöni inte mönitö minitö iminite, Pönömini æninque quëwencæmönimpa, ämöni bai waa incædönimpa. Wæætë minitö weca quëwëninque mönitö wäänä nänö wëñænäni guiyänäni inänite ædæmö cædä bai adobai minitö iminite cætamönipa. ⁸ Minitö iminite nanguipöni waadete pönëmöni inte mönitö, Itota ingantedö ante Wængongui nänö watapæ apænedö ante minitö iminite apænedinque watapæ totamönipa. Ayæ minitö nö möni nē waademini inöminite mönitö minitö beyæ quëwentamönipa. Ayæ minitö beyæ wæmöni incæ adobai watapæ tobaimönipa. ⁹ Mönitö töninamini ëñeedäni. Nangui pöni möni cædinö ante minitö do ëñëmünipa. Itota ingantedö ante Wængongui nänö watapæ apænedö ante mönitö minitö weca quëwente apænedinque, Möni quëwengæimpa, ante wii eyepæ godö wædö ante dicæ antamöniyaa. Wæætë edæ, Minitö wædämaï incæminimpa, ante mönitö itædë incæ woyowotæ incæ tömëmöni nangui cædinque ænte quëwentamönipa.

¹⁰ Minitö nē wede pönëmüni weca quëwëninque mönitö tæiyæ waëmö ewocamöni inte nö cæte quëwëñömönite minitö, Wënæ wënæ cæminipa, ante ædö cæte anguimüni. Wæætë mönitö cædinö adinque minitö, Mönitö æbänö quëwëmöni imönii, ante do amüni inte nē apænemüni imünipa. Wængongui adobai ante do acä ingampa. ¹¹ Edæ waocä mæmpocä tömengä wëñænäni inönänite tömengä, Minitö ëñenguimüni, ante odömongä bai mönitö adobai minitö tömämüni inöminite adocanque adocanque ingante, Bitö ëñenguimüni,

ante odömonte apænetamönipa. Mänömaï cætamönipa, ante minitö do eñëminipa. ¹² Mini quëwënö adinque Wængonguï tocæcäimpa, ante cædinque minitö tæiyæ waëmö quëwencæminimpa, ante mönitö nanguï apænetamönipa. Ayæ, minitö mänömaï cæte quëwencæminimpa, ante waadete apænetamönipa. Ayæ adobaï mönitö wæætë wæætë apænedinque minitö iminite adodö ante ancaa apænetamönipa. Wængonguï iñömö, Botö Awënë Odeye nempo quëwëninque minitö botö ñäö emöñömö botö tönö godongämæ quëwencæminimpa, ante tömengä minitö iminite aa pedinque apænte ængampa.

¹³ Ayæ adobaï mönitö Wængonguï nänö angainö ante minitö iminite apænemöni eñëninque minitö ö ænte do pönëminitapa. Näwangä Wængonguï nänö angainö impa, ante adinque minitö, Wü waodänique nani angainö impa, ante pönëninque wæætë, Näwangä Wængonguï nänö angainö impa, ante pönëninque ö æminitapa. Ìninque minitö në wede pönëmini inte Wængonguï nänö angainö entawëmini beyænque nanguï cæmini iminipa, ante eñëninque mönitö Wængonguï ingante cöwë waa ate pönente apænemönipa. ¹⁴ Oodeabæ iñömö Wængonguï ingante godongämæ nani pönencabo iñömö tömengä nempo quëwëñönänite oodeoidi tömënäni inänite togænte pänäni wädäni bai minitö mönitö tönïñamini iñömlini minitö ömæ iñömö në quëwënäni incæ minitö iminite adobaï cädäni wæminitapa. Mänömaï cädäni wædinque minitö Oodeabæ iñömö Wængonguï ingante godongämæ nani pönencabo wädäni bai adobaï wæmini baminitapa.

15 Oodeoidi iñömö Wængongui beyæ nē apænegaināni inānite wænōnāni wængadānimpa. Ayæ ate tōmēnāni pæināni iñömö Itota Codito ingante wænōnāni wængacāimpa. Ayæ ñōwodāni adocabodāni incæ mōnitō imōnite adobaī togænte wido cædānitapa. Mānināni nāni cædinō adinque Wængongui tōmēnāni inānite ædō cæte waa aquingāā. Adodāni incæ waodāni tōmānāni inānite pīinte quēwēnōnānimpa tōō. 16 Edæ oodeoidi ināmaī ināni inānite, Codito ængā beyænque mīnitō quēwencæminimpa, ante apænedāmaī incæminimpa, ante cæcæte ante mānināni oodeoidi incæ mōnitō imōnite Baa āninqe wææ cædānipa tōō. Mānōmaī cōwē wēnæ wēnæ cædinque tōmēnāni wæætē wæætē nāni wēnæ wēnæ cædincoo idæwaa cædānipa. Idæwaa i ininqe Wængongui nānō ængui bate pīimāmo tōmēnāniya do pongatimpa.

Tetadönitenteidi weca Pabodo eñacæ pōinente wæcampa

17 Incæte mōnitō tōniñamīni eñēedāni. Tōmēnāni ānāni beyæ mōnitō mīnitō imīnite emō cæte godinque wīi wantæpiyæ ante gotamōnipa. Godinque mīnitō imīnite adāmaī imōni incæte mōnitō mīnitō beyæ ante cōwē pōnentamōnipa. Mīnitō imīnite nanguī aīnente wæmōni inte mōnitō, Æbānō cæte goquimōnii, ante pōnēninque nanguī cætāmōnipa. 18 Edæ mīnitō weca pōinente wætāmōnipa. Botō Pabodobo inōmo inte wæætē wæætē nō pōinēmo intabopa. Mōnitō pōinēmōni incæte Tatāna wæætē mōnitō imōnite wææ cæcā wætāmōnipa. 19 Mōnō Itota Codito nānō ponguionæ tōmengā weca ongōninque mōnitō æbānō ante beyæ watapæ bacæimpa, ante

pönēmōni imōnii. Wīi mīnitō beyænque toquīmōnii. Edæ nē pönēmīni inōmīni inte mīnitō do mōni nē watapæ todōmīni imīnitapa. Ayæ waodāni tæi emonte gānā cædinque poganta ænte todāni bai mīnitō beyænque ante mōnitō nē toquīmōni imōnipa. ²⁰ Nāwangā impa. Waa pōni cæmīni ininque mīnitō mōni nē waa amīni inōmīni inte mōni nē watapæ todōmīni imīnipa.

3

¹ Mānōmaī beyæ mōnitō, Mīnitō imīnite adāmaī inte awædō, āninque, Ædō cæte godōmenque wānō cōmōni inguīmōnii, ante pōnēninque mōnatō adomōnaque Atēna iñōmō ongonguēnēmōna imōnapa, ante pōnente wætāmōnapa. ² Ayæ Tīmoteo nē mōnō tōniñacā ingante mīnitō weca ante da pōnōmōna pongantapa. Tōmengā iñōmō Wængonguī tōnō godongāmæ cædongā iñongante Itota mōnō Codito ingantedō ante mōnō watapæ apænedō ante eñencædānimpa, ante odōmonte apænedongā ingampa. Tōmengā mīnitō imīnite, Mīni wede pōnēnō ante tæi ongonte quēwēedāni, ante ayæ, Wampo pōnēninque tæi piñænte cæedāni, ante ædæmō apænecæcāimpa, ante mōnatō tōmengā ingante da pōnōmōna pongantapa. ³ Wadāni mīnitō imīnite quiēmē cædāni caate wæmīni incæte tōmāmīni wadō pōnēnāmaī inte ñimpo cædāmaī incæmīnimpa, ante cædinque Tīmoteo ingante da pōnōmōna pongantapa. Mōnō imonte cōwē mānōmaī cædāni caate wæquēnēmō imōmpa, ante mīnitō do edonque pōni eñēmīnipa. ⁴ Ayæ mīnitō weca mōni quēwēñedē mōnitō mīnitō imīnite apænedinque,

Mönö imonte quiëmë bai togænte panguïnänidö anguënë, ante wæætë wæætë apænetamönipa. Edæ mïnitö ëñënö bai mäninö do batimpa. ⁵ Mänömaï beyæ botö, Ædö cæte godömenque wänö cömo inguïmoo, ante, Mïni wede pönënö æbänö impa, ante botö ëñencæboimpa, ante Tïmoteo ingante da pönömo pongantapa. Wënæ awënë, Oda cæe, ante në anewënongå iñömö mïnitö imïnite, Oda cæedäni, angä ëñëninque mïnitö wabänö ëñëmïnipa, ante botö ancai guiñente wætabopa. Mänömaï ëñente cæmïni ïninque mönitö cædinö wo ewente babaimpa, ante pönentabopa.

⁶ Incæte Tïmoteo mïnitö weca quëwëninque ñöwoque mönitö weca ocæ ëmænte pongantapa. Mïni wede pönënö ante apænedinque tömengä, Wede pönënanipa, angantapa. Ayæ, Në waadete pönënanï inänipa, ante apænecä ëñentamönapa. Mïnitö mönatö beyæ cöwë waa pönëmïni imïnipa, ante tömengä apænecä ëñentamönapa. Ayæ mönatö mïnitö imïnite ainëmöna inte wæmöna bai mïnitö adobaï mönatö imönate ainëmïni inte wæmïni imïnipa, angantapa. ⁷ Mänömaï beyæ mönitö tönïñamïni ëñëedäni. Quiëmë beyæ wæmöna incæ ayæ mönatö imönate togænte pänäni wæwëmöna incæte mönatö mïni wede pönënö beyænque wæætë wampo pönente batamönapa. ⁸ Mïnitö mönö Awënë ingante ñïmpo cædämaï pönëmïni beyænque mönatö ñöwo wampo pönente bai quëwëmöna imönapa. ⁹ Mönatö mönö Mæmpo Wængonguï weca ongöninque mïnitö beyæ nanguï watapæ tomöna inte wæætë apænëmönapa. Incæte mïnitö beyæ ante Wængonguï ingante ædö cæte waa ate pönente

eyepæ apænequimönaa. ¹⁰ Minitö mini wede pönönö ante æbänö ayæ wii eyepæ pönëminii, ante wæmönipa. Ìninqe, Minitö ìminite wæætë adinque mōnitō odōmonte apænemōni eñëninque mīnitō eyepæ pōnencæmīnimpa, ante cædinque mōnitō woyowotæ itæde Wængonguï ingante nō nanguï pōni apænemōni ìmōnipa.

¹¹ Wængonguï mönō Mæmpo incæ mönō Awënë Itota Codito tönō möni goquinō ante tōinō pinonte bai cæda ate mīnitō weca gocæmōnimpa. ¹² Mōnitō mīnitō ìminite godōmenque waadete pōnëmōni bai mönō Awënë Itota pōnō cæcä ate mīnitō adobai mīnitō weca wacä ingä wacä ingä godōmenque godōmenque waadete pōnencæmīnimpa, ämōnipa. Ayæ waodäni tōmänäni inänite godōmenque waadete pōnencæmīnimpa, ämōnipa. ¹³ Tömengä pōnō cæcä beyænque mīnitō tæimō entawente incæmīnimpa, ämōnipa. Edæ mönō Awënë Itota quinäni nē tæiyæ waëmō ewocadäni tōmänäni tōmengä tönō godongämæ poncædānimpa. Tömēnāni nāni pōñedē mīnitō iñömō Wængonguï mönō Mæmpo weca pōmīni adinque tōmengä ædō cæte, Wēnæ wēnæ cæmīni ìmōnipa, ante anguingää. Mīnitō tæiyæ waëmō ewocamīni incæmīnimpa, ämōnipa.

4

Wængonguï waa acæcäimpa, ante mönō quëwënö ante

¹ Mōnitō tōniñamīni eñëedäni. Adodeque ayæ apænequimōni ìmōnipa. Mīni quëwënö ante Wængonguï waa acæcäimpa, ante mōnitō, Ìlmai quëwëedäni, ante do wææ odōmonte apænemōni

ēñēmīnitawo. Īnīnque mīnitō Ao ante quēwēnōmīni īmīnīpa. Nōwo īñōmō mōnitō Awēnē Itota ēmōwo ante apænedīnque mīnitō īmīnite, Mānīnonque ante gomonga cæte quēwēncæmīnīpa, ante ancaa apænēmōnīpa.

² Awēnē Itota nānō ānō ante ēñēnte cædīnque mōnitō mīnitō īmīnite wææ ānīnque, Īīmaī cæedāni, antamōnīpa. Mānīnō mōni wææ ante odōmonte apænedō ante mīnitō do ēñēnīmīnīpa.

³ Wængonguī nānō ānō īñōmō īīmaī impa. Mīnitō īñōmō tæiyæ waēmō ēwocate quēwēnguēnēmīni īmīnīpa. Wacā nānōogæ ingante godō towente cædāmaī inte edæ ōnonque mīni nānōogænque quēwēnguēnēmīni īmīnīpa.

⁴ Onguīñæmīni tōmāmīni īñōmō, Botō moncæboīmpa, ante cædīnque mīnitō, Æbānō cæte nānōogæ æmo ate Wængonguī tōnō waodāni waa aquīnānīi, ante ēñēnguēnēmīni īmīnīpa. Mīnitō, Tæiyæ waēmō ēwocadīnque ængæīmpa, ante ēñēnguēnēmīni īmīnīpa.

⁵ Wīī wadāni baī, Wængonguī ingante æbānō ingaingā ingāā, ante ēñēnāmaī īnāni baī onquiyænque ante nāni towēnonque ante pōnēnāmaī quēwēncæmīnīpa.

⁶ Mānīnō ante nē pōnengā īñōmō, Botō tōnīñacā nānōogængā ingampa, ante pōnēnīnque tōmengā nānōogæ ingante towente cædāmaī īnīnque tōmengā ingante wēnæ wēnæ cædāmaī incæcāīmpa.

Īīmaī wēnæ wēnæ cædāni īnānite Awēnē Itota pancæcāīmpa. Wēēnēñedē mānīnō ante mīnitō īmīnite apænedīnque do wææ angamōnīpa.

⁷ Edæ Wængonguī mōnō īmonte wīī, Towēncæmīnīpa, ante apænte

ængacäimpa. Wæætē, Minitō tæiyæ waēmō ewocate quēwencæminimpa, ante tōmengä mönō imonte apænte ængacäimpa. ⁸ Mänōmaï beyæ æcänō mäninō ante Pabodo nänō, İïmaï cædäni, ante nänō wææ odōmonte apænedō ēñēninqe Baa äna iñömō tōmengä wii waodänique inänite ēñēnämaï inte Baa angä ingampa. Wæætē Wængongui minitō iminite nänō Tæiyæ Waēmō Önowoca nē pōnogä ingante ēñēnämaï inte Baa angä apa quēwēmīni.

⁹ Mīni pōnencabo mīni tōniñadäni iñönänite mīni waadete pōnēnō ante mönitō quīnante yewæmonguimōnii. Edæ mīnitō tōmēmīni iminite, Wacä ingä wacä ingä waadete pōnencæminimpa, ante Wængongui odōmonte apæncä ēñēmīnitapa tōö. ¹⁰ Nō impa. Mäatedöniabæ tōmämæ iñömō mönō pōnencabo mönō tōniñadäni tōmänäni inänite do waadete pōnēmīni imīnīpa. Incæte möni tōniñamīni, Mīnitō mäninō ante gomonga cæte quēwencæminimpa, ante ancaa apænemōnīpa. ¹¹ Mīnitō piyænē cæte quēwencæminimpa. Wadäni, Æbänō cæquēnēnāni inānii, ante cōwē änāmaï incæminimpa. Ayæ, Wæntæye ināmaï inte mīni önompoca cæte quēwencæminimpa. Mäninō do möni apænedō bai mīnitō, Cæinēmōnīpa, ante cæcæminimpa, ämōnīpa. ¹² Mänōmaï cæmīni bai iimō iñō iimō iñō mīni quēwēnō adinqe wadäni nē pōnēnämaï ināni wæætē mīnitō iminite waa acædänīpa. Ayæ adobai mīnitō waodäni inänite, Pönömīni æncæmōnīpa, ante änewēnämaï quēwencæminimpa.

Mönö Awënë Itota nänö occē emænte ponguionæ

13 Mönitö tönĩñamĩni eññeedāni. Nē æmæwo wængaināni iñömö æbānō baquĩnāni, ante mĩnitö eññencæmĩnimpa, ante yewæmömönipa. Wadāni, Mönö ñāni ömæmongæimpa, ante pönēnāmāi ināni inte wæwēnāni bai mĩnitö wĩi adobāi wæwēmĩni incæmĩnimpa, ante yewæmömönipa. 14 Itota æmæwo wæningā incæ ñāni ömæmonte inongāimpa, ante pönēmö imompa. Itota ingante pönente nē wængaināni iñönānite Wængonguĩ iñömö mānĩnāni inānite Itota tönö tömengā weca ænte māmongā poncædānimpa, ante adobāi pönēmompa.

15 Wængonguĩ nānō apænedö bai mönitö iimāi ante mĩnitö imĩnite apænemönipa. Awēnē Itota nānō ponguĩönæ mönō nē mĩimö quēwēmö inte ayæ ongömö iñömö mönö wĩi tāno tömengā weca gocæmöimpa. Wæætē tömengā ingante pönēninque nē æmæwo wængaināni inte mānĩnāni iñömö tāno goquĩnānidö anguēnē. 16 Edæ mönö Awēnē Wængonguĩ nānō wææ ānonque ante yedæ āñongā Wængonguĩ anquedoidi tæiyæ awēnē aa pecæcāimpa. Wængonguĩ todompeta nāni ancadeca adocanque we we öoncæ cæyongā mönö Awēnē Codito incæ öönædē quēwente pö wææncæcāimpa. Pö wææñongā tömengā ingante nē pönente wængaināni tömēnāni tāno ñāni ömæmoncædānimpa. 17 Ayæ ate Wængonguĩ cæcā beyænque mönö nē mĩimö quēwēmö inte ayæ ongömö iñömö mönö tömēnāni tönö godongāmæ boguĩmancodē æicæmöimpa. Boguĩmancodē æidĩnque mönö Awēnē öönædē inö wææ pöñongante mönö tömengā ingante bee tencæmöimpa. İnĩnque cōwē Awēnē weca

quëwencæmöimpa. ¹⁸ Mänömaï beyæ, Mönö Awënë Codito incæ öönædë quëwente pö wææncæcäimpa, ante pönëninque wampo pönencædänimpa, ante cædinque mīnitö wacä ingä wacä ingä ædæmö apæneedäni.

5

¹ Nöwo mönitö tönīñamīni ëñëedäni. Æönædö mänīi baquīi, ante mīnitö imīnite ædö cæte yewæmonguimōnii. ² Edæ mönö Awënë Itota nänö ponguionæ iñömö nē awëmö ængä woyowotæ iñontobæ pö guicä bai iñontobæ baquinö anguënë, ante mīnitö tömēmīni waa ëñēmīnīpa edæ. ³ Waodäni, Mönö piyænë cæte guiñenāmaï quëwëmōmpa, ante nāni tedeyedë ënengä iñontobæ wëñæ nantate wæcä bai tömënāni adobai iñontobæ nāni ömæe ewenguinö baquinö anguënë. Ìnīnque ædö cæte wodii winonguinānii.

⁴ Incæte mīnitö mönitö tönīñamīni ëñëedäni. Mänionæ nāni wæwente eönæ nē awëmö ænongä pö guicä bai iñontobæ ïnīnque bayonte mīnitö wīi wëmö iñömö quëwēmīni inte guiñenāmaï incæmīnīpa. ⁵ Mīnitö Wængonguī wëñæmīni imīni ïnīnque ñäö iñömö tömämīni quëwēmīni imīnīpa. Mönö cöwë wentamö iñömö cædönāni bai wīi imöimpa. ⁶ Mänömaï beyæ mönö wīi wadāni mö ñönāni bai mongæimpa. Wæætë mönö ñāni ömæmōnīnque nāmā wææ ante quëwëmö ingæimpa. ⁷ Edæ tömënāni nē mönāni iñömö woyowotæ mönāni ïnānīpa. Ayæ wadāni tī nāmæ bedīnque nē quidi quidi dowænte ïnāni iñömö woyowotæ bete badānīpa. ⁸ Incæte mönö ñäö iñömö cægömö inte nāmā wææ ante

quëwëmö ingæimpa. Tæineta wææ wëñate bai cædinque Itota ingante mönö wede pönënö ante mönö waadete pönënö ante mönö entawente quëwengæimpa. Tæineta ocabogata wææ encate bai cædinque mönö edæ, Wængongui ængä beyænque quëwencæmöimpa, ante pönënö ante mönö ëwocate quëwengæimpa. ⁹ Edæ Wængongui nänö ængui bate piinguimämo ante tömengä, Wii wæwencæminimpa, ante mönö imonte apænte ængacäimpa. Wæætë mönö Awënë Itota beyæ tömengä mönö imonte ængä beyænque quëwencæmöimpa. ¹⁰ Tömengä, Botö tönö quëwencæminimpa, ante mönö beyæ wængacäimpa. Inique miï imö incæ wænte imö incæ mönö cöwë tömengä weca quëwencæmöimpa. ¹¹ Mänömai beyæ minitö iñömö do cæmini bai gomonga cæedäni. Wampo pönencædänimpa, ante cædinque minitö wacä ingä wacä ingä ædæmö apænedinque, Æmæwo pægaimini inte tæi piñænte cæedäni, ante odömonte apæneedäni.

Mönö tönñadäni inänite Pabodo nänö änö

¹² Nöwo mönitö tönñamini ëñeedäni. Minitö iminite iïmai apænemönipa. Minitö weca në nanguï odömonte apænedäni iñönänite minitö tömënäni inänite waa acæminimpa, ämönipa. Edæ Awënë Itota apænte nänö æninäni inte tömënäni, Minitö iïmai waa quëwëedäni, ante minitö iminite në aadäni inänipa. ¹³ Tömënäni nani cædö beyænque minitö tömënäni inänite godömenque nanguï waa amini inte waadete pönëedäni. Minitö wacä ingä wacä ingä piyænë cæte quëwëedäni.

14 Mönitö tönifamini eñeedäni. Minitö iminite iimai ante ancaa amönipa. Wæntæye inäni inänite wææ ante apæneedäni. Guiñente inäni wampo pönencædanimpa, ante tömënäni inänite ædæmō apæneedäni. Æmæ pönënäni tönō godongämæ cæedäni. Wadäni tömänäni inänite minitö waadete ee cæedäni amönipa.

15 Æcämenque ingante wadäni wënæ wënæ cædäni adinque minitö Baa amini beyænque mäninäni wæætedō wæætē näëmæ wënæ wënæ cædämaï incædanimpa. Wæætē wacä ingä wacä ingä cōwē waa cæcæmönimpa, ante pönëninque cæedäni. Ayæ wadäni tömänäni inänite adobaï cæedäni.

16 Minitö cōwē watapæ tote quëwëedäni. 17 Wængonguï ingante woyowotæ itædē apænete quëwëedäni. 18 Mini quëwenganca quiëmē bai ba incæte minitö cōwē Wængonguï ingante waa ate pönëninque apæneedäni. Edæ Itota Codito nempo nē quëwëmini inte mäninō ante minitö beyæ ante Wængonguï nänō änō impa.

19 Wængonguï Önōwoca nänō cæinō adinque minitö tömengä ingante ædō cæte, Cædämaï ië, ante wææ anguimīnii. 20 Wængonguï beyæ nē apænedäni nāni apænedō eñëninque minitö badete todämaï quëwëedäni. 21 Wæætē waodäni nāni apænedō tömänō ante eñëninque, Æbänō i, ante edonque eñengæimpa, ante cædinque minitö, Nō nāni änō i, Babæ nāni änō i, ante pönëninque do eñencæminimpa. Waa änō impa, ante eñëninque minitö mäninō ante ö ænte bai quëwëedäni. 22 Quiëmē wënæ wënæ cæquī, ante adinque minitö Baa ante gomō aedäni.

²³ Wængonguï incæ nē piyænē cædongä inte pönö cæcä beyænque ædæmō tæiyæ waëmō entawēmīni incæmīnimpa. Awënē Itota mönō Codito tömengä nänō ponguinganca mīnitō iñömō Wængonguï pönö cæcä ate mīnitō mīmō incæ önōwoca incæ baonga incæ wënæ wënæ cædāmaï incæmīnimpa. ²⁴ Wængonguï nänō nē apænte ænimīni iñöminite tömengä mīnitō imīnite cōwē pönëninque tömengä nänō änō bai ædæmō cæcæcäimpa.

Pabodo, Waa quëwencæmīnimpa, angampa

²⁵ Mönitō tönīñamīni iñömō ëñëedäni. Mīnitō mönitō beyæ ante Wængonguï ingante apæneedäni. ²⁶ Mīnitō pönencabo iñöminite mönitō tömämīni waa quëwencæmīnimpa, ante waadete pönëninque ämönipa. ²⁷ Edæ Awënē Itota ëñëñongä botō mīnitō imīnite wææ ante, ïi yewæmöinta adinque mīnitō mīni pönencabo iñöminite adocanque ingante ämīni tömänäni ëñëñönäni tömengä adotaa adinque apænecä ëñencædänimpa, ämopa. ²⁸ Awënē Itota mönō Codito mīnitō imīnite waadete pönö cæcæcäimpa, ante botō mäninque ante yewæmömopa.

Wængongui nänö Apænegainö
New Testament in Waorani (EC:auc:Waorani)

copyright © 2009 Wycliffe Bible Translators, Inc.

Language: Waorani

Translation by: Wycliffe Bible Translators, Inc.

Waorani [auc], Ecuador

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Waorani

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022

9bedab5a-39ff-5163-a35b-8056cbbe8690